

Käthi da Vrin è la dunna dal nov president da Son Gagl

DA CLAUDIA CADRUVI / ANR

■ **Franz Hagmann-Casanova è il nov president da la citad da Son Gagl. Sia dunna ha num Käthi e deriva da Vrin. L'anr ha fatg ina visita ad ella.** D'ina dunna d'in president spetgan ins forsa ch'ella haja ina demananza da dama e viva in ina villa. *Käthi Hagmann-Casanova* na sa cunfa betg cun in tal cliché. Ella e ses um vivan dapi trenta onns en in grond bloc a l'ur da Son Gagl.

Il num da batten fiss atgnamain Catrina. «Ma sch'ins di Catrina, nagin che sa tgi ch'è manegià», declera Käthi Hagmann-Casanova: «En famiglia e pli baud a Vrin, han tuts adina ditg Käthi.» Il num Käthi va bain a prà cun la persunalitad da Hagmann. Käthi tuna simpel e natiral. Ed uschia è ella era.

Il temp da scola

Käthi è naschida il 1941 ed è creschida si en ina famiglia da sis uffants. Il bab era scolast. Els avevan ina vatga ed intgins tiers manidels. «Igl era il temp ch'ins na laschava betg ir las mattatschas a scola reala», sa regorda Hagmann. Ma il scolast da la sisavla aveva cusseglià a la mamma da laschar ir questa mattatscha ora Vella. Ir a scola reala ora Vella u ora Glion na muntava betg sulet ina meglra scolaziun: Ins stueva era lavar da las 6.00 e sbrigar sin l'auto da posta.

Suenter ha ella emprendì da scolasta en l'institut Heilig Kreuz a Cham. L'emprima piazza ha Hagmann chattà en il Toggenburg nua ch'ella ha emprendì d'enconuscher ses um.

Il 1972 ha ella fatg ina scolaziun supplementara da legastenia e fin avant quatter onns ha ella dà uras ad uffants cun legastenia.

«Tut è i bain»

Sch'ins dumonda Käthi Hagmann, tge che saja stà impurtant en sia vita, dumonda ella enavos: Il positiv u il sumbrivaun? L'emprim il positiv: «Jau hai gì in flot um, e tut è i bain», di ella. Cun quai manegia ella cunzunt ch'i saja i



La devisa da Catrina Hagmann: «Ins duai esser, sco ins è.»

FOTO C. CADRUVI

bain cun sias figlias che han uss gia 24 e 30 onns.

Fin che la mamma a Vrin viveva anc, èn ils Hagmanns savens ids en il Grischun. Quai saja stà impurtant per las figlias che n'emblidian betg las experienschas ch'ellas hajan fatg en las vacanzas entadim la Lumnezia.

Era a Son Gagl han ils Hagmanns contacts cun Rumantschs. Els chantan en il chor da l'Associaziun grischuna, e Käthi Hagmann visita mintg'onn il turnus da prelecziuns da litteratura rumantscha a l'universitad.

Cancer

Las experienschas stgiras ha Käthi Hagmann stuì far avant tschintg onns cura ch'igl è vegnì ora ch'ella ha cancer. «Il mument ch'ins intervegn quai, han ins il sentiment, uss mor'ins. I va ditg fin ch'ins po metter giu quest patratg e vesa pli cler», di Hagmann.

L'operaziun è dentant ida bain ed era la chemoterapia. «Jau hai gì cletg», di el-

la, ma aschunta era: «Quest schoc n'emblidan ins betg pli, e las temas restan.»

L'entschatta da quest onn èsi capità anc ina giada, ma quella giada è Franz Hagmann stà l'unfrenda dal cancer.

Candidatura per il presidi

Curt suenter che Franz Hagmann aveva trapassà l'operaziun e la terapia, è vegnì enconuscent: Il presidi da la citad da Son Gagl vegn liber il 2005. Franz Hagmann è gia dudesch onns cusseglier da la citad. Uschia èsi sa tschentà la dumonda, sch'el duai candidar.

Suenter intginas discussiuns cun la dunna eri cler: Gea, el candidescha.

Ils 31 d'october han ils votants elegì el en il segund scrutini cun 9300 vuschs. Sia concurrenta *Elisabeth Béery* ha stuì succumber cun 8600 vuschs.

24 onns era il presidi adina stà en ils mauns dals sanesters. Cun Franz Hagmann da la pcd è uss in burgais al domini. Il temp avant las elecziuns n'è betg adina stà empernaivel per Käthi Hagmann.

Sch'ella legeva las gasettas e chattava brevs da lecturs malvulidas cunter ses um, prendeva ella ellas per cor e na pudeva magari gnanca gentar. La saira, sche l'um turnava, scheva lez: «Quai na stoss ti betg prender uschè serius. Ti na fissan nagut per la politica.»

Ils proxims quatter onns?

Gia da bell'entschatta ha Franz Hagmann ditg ch'el restia be quatter onns president. Tge spetga quels quatter onns sin Käthi Hagmann? È ella savens persula? U ha ella ina massa terminis ed obligaziuns da representaziun ensemen cun ses um?

Käthi Hagmann n'ha betg starmet. Ils ultims onns haja ses um gia gì sut el il departament cun ils manaschis tecnics da Son Gagl. Igl è in deparatament che dat blera lavur. Sco president da la citad vegn el ad avair il departament da finanzas. Lez saja main intensiv, declera Käthi Hagmann.

Ils Hagmanns vegnian perquai a dar tennis sco usità ina giada l'emna ed ad far lungas spassegiadas en il Brengenzwald.

Midadas datti forsa tar las occurrenzas: Fin uss ha Käthi Hagmann adina gì cumplaina libertad da visitar occurrenzas nua che ses um era envità. Ils proxims onns vegni a dar entginas occurrenzas ch'ins spetga ch'il president vegnia en «accompagnament». Ma da quai na ha Käthi Hagmann betg tema. Ella ha ina buna devisa: «Ins duai esser, sco ins è.» E speranza gartegia quai ad ella era ils proxims quatter onns.

Curt e bun

Num:

Catrina Hagmann-Casanova

Di da naschienscha:

ils 8 da december 1941

Segn: tiradur

Clamada: scolasta

Spaisa preferida: capuns

Bavronda: aua minerala

Hobis: cantar, ligns en crusch

Sport: tennis, ballape cun rait

Auturs preferids:

Gion Deplazes, Eveline Hasler

Musica: classica, cunzunt Verdi

